

Łogorkowe lato

No, toż momy jużaś – jak to gorole godajom – tyn „sezon ogórkowy”. To ci som telke tydnie we kierych idzie ujzdrzić ta dupno szlanga we tym rybniku, kiery sie Loch Ness mianuje, we kierych łod hicy niyftorym zaparzonym jongferom we zdrzadle pokazywo sie Przenojświyntszo Paniynka, i we kierych ci już żodnego niy ruszo to, wiela modziokow sie tonkło w gliniokach abo wiela ałtokow we sia wkarowało, fligrow śleciało i wiela przy tymu ludziow wykopyrtło. Koždy ino gracom świtnie i godo, iże to niy jejigo gyszeft. Nale, u nos, nikiej to momy we zwyku, wszyjsko ci je na łodwyrтка. Te srogie angyjbery, kiej sie ino doczkajom, iże ludziska styrcom na sztrece we jejich ałtokach, wyrcom na sia na banhowie kole cugu i roztopiyrazajom sie coby lepszejszy plac erbnońć na piosku (nojlpszij wele sztandu ze piwym lebo zeltrym), zarozki napoczynajom roztomajte mecyje na tyj polskij binie wynokwiać. Nojprzodzij to sie dwioch durch wadziło: tyn minister łod „finansow” ze tym istnym łod pijyndzy, eli majom te „procynty” sztreknońć na wyrch eli majom łone ślecieć na psychol? Do tego zaczoł sie jesce wrażować i Pon Prezidynt i tyn wigyjc Miller. Larmo i łostuda wyłonaczola sie na cołko Ojropa. Ku tymu jesce tyn fimel Lepper pedzioł boł, iże wszyjskie pamponie wylezom ze kosokoma i grabioma na cesty i bydcom suć obiyli ze wagonow na glajzy. Łon tam ale mog sie godać co kcioł tela ino, iże bambry i siodloki niy som przecamć telkie ipty i gupieloki coby niy gawcyli na swój gyszeft, niy dowali pozor eźli wszyjsko do porzondku źdzejke, eli je dostone, ino pyndalowali coby cołki ruch na drogach brymzować.

Tak ci sie to wszyjsko belontało, tak machlowało aże praskło choby Bercikowi galoty na rzici. Tyn minister łod „finasow”, tyn cołki Belka to ci sie na isto som za balek wcis i tela. Pedzioł, iże bez te dziewiyńć miesiyncy tak sie nabakoł choby baba pokiel ze cwilingrami niy ślegnie. Niy kcioł ci go Prymiyr puścić na wywcasy, to mu na paskuda cieпноł papiorami na blat. Ku tymu zasik tyn minister łod kultury, tyn cołki kulturtryjger (choby u nos na Pniokach) Celiński tyż niy poradzioł ściyrpieć – jak som godoł we telewizyji – tych roztomajtych Zanussich, pynzjonistow Wajdow i inkszych łoszkliwcow i tyż prasknoł dźwiyrzami i wykludzioł sie na świyży luft. Tak ci to wszyjsko dopoloło Millerowi – bo jesce mu roztomajte chachary i rabsiki pitali ze heresztu, praskali do sia ze gywerow i na łostatek jedyn telki miglanc mu sie hangnoł we hereszcie na poszwie – i łodpoloł sie na tyj gryfnij Barborce Piwnik i tyż ci jom ze roboty wycieпноł. Jedyn ino zabrany glacok Oleksy niy doł sie na tyn futer nabrać i pedzioł, iże niy sztartnie do kupy ze lachytom Olechowskim i kurduplym Kaczyńskim (tym co to ze braciowym zachachmynciyli miesionczek) we welonku na prezidynta Warszawy.

U nos we Chorzowie tyż ci sie już poruch na tyn zesel rychtuje, nale ło tym to już kiej indzij naszkryflom.

No to pyrsk.

Ojgyn z Pnioków